



**MEMBANTERAS RASUAH**

**MENINGKATKAN  
STANDARD INTEGRITI**



### YB SENATOR DATUK PAUL LOW SENG KUAN

Menteri di Jabatan Perdana Menteri

Kerajaan Malaysia sentiasa tegas dalam meneruskan iltizam untuk menghapuskan gejala rasuah. Usaha ini memerlukan pelaksanaan pembaharuan tegas yang memerlukan sokongan semua pihak. Walaupun usaha lebih gigih diperlukan untuk membasmi rasuah dalam negara kita, kita juga perlu mengakui bahawa pelbagai kemajuan besar telah dapat dicapai sejak Kerajaan menjadikan usaha membanteras rasuah salah satu keutamaan di bawah NTP.

Pencapaian ini terbukti melalui Peruntukan Liabiliti Korporat dalam Akta SPRM yang kini sedang dirangka. Usaha ini menandakan langkah penting dalam mempertanggungjawabkan syarikat-syarikat atas amalan rasuah. Sistem Pengurusan Antirasuah MS-ISO 37001 juga telah diperkenalkan untuk membantu organisasi-organisasi menguatkuasakan langkah-langkah yang menepati amalan dan kawalan antirasuah yang diiktiraf di peringkat antarabangsa. Saya pasti bahawa perkembangan ini akan menyumbang kepada peningkatan budaya kejujuran dan integriti di negara kita.

Saya juga berbesar hati menyatakan bahawa Suruhanjaya Pencegahan Rasuah Malaysia (SPRM) telah meningkatkan usaha mereka dalam penyiasatan dan penyelesaian kes-kes rasuah. Pada tahun 2017, SPRM berjaya menyelesaikan siasatan dan mendapatkan sabitan bagi 80.7% daripada jumlah kes yang didaftarkan. SPRM akan meneruskan usaha untuk memperkukuh penguatkuasaannya dalam memerangi rasuah selagi ia berleluasa.

Seiring dengan inisiatif-inisiatif yang dinyatakan di atas, Bahagian Integriti dan Tadbir Urus (BITU) Jabatan Perdana Menteri yang ditubuhkan pada tahun 2015 telah dinaiktaraf kepada Jabatan Integriti dan Tadbir Urus Negara (JITN) untuk mengukuhkan infrastruktur keinstitutional bagi pembanteras rasuah. Langkah ini akan menyokong dan mengukuhkan NKRA melalui

penyelarasan pihak berkepentingan yang lebih baik dan pembangunan keupayaan penjawat awam bagi meningkatkan lagi penyampaian tadbir urus, integriti dan pematuhan yang baik dalam amalan hak asasi manusia. JITN turut bekerjasama dengan organisasi luar seperti Perikatan Integriti Perniagaan (Business Integrity Alliance, BIA) dan Institut Tadbir Urus Korporat Malaysia (Malaysian Institute of Corporate Governance, MICG) untuk menggalakkan inisiatif tadbir urus yang baik dalam sektor swasta, serta mempertingkatkan pengetahuan dan pendedahan terhadap amalan terbaik dalam tadbir urus korporat.

Semua usaha ini amat penting untuk menambah baik skor Indeks Persepsi Rasuah (Corruption Perception Index, CPI), di mana Kerajaan berhasrat untuk menjadi antara 30 negara terbaik dalam Indeks ini menjelang tahun 2020. Pada tahun 2017, Malaysia berada pada kedudukan ke-62 daripada 180 negara. Berikutan ini, pihak Kerajaan telah mengadakan bengkel pada September 2017 untuk meningkatkan kedudukan CPI negara. Berikutan bengkel ini, tujuh inisiatif untuk menambah baik usaha-usaha pencegahan dan penguatkuasaan antirasuah kini berada dalam proses pelaksanaan.

Dengan hasrat dan tekad politik yang jitu untuk mengekang kegiatan rasuah, penipuan dan salah laku lain melalui pendekatan yang lebih pragmatik dan menyeluruh, saya yakin bahawa Malaysia akan mencapai tahap integriti yang lebih tinggi menjelang tahun 2020.

## PENDIRIAN YANG TEGAS DALAM MENENTANG AMALAN RASUAH

Pelan Hala Tuju NTP telah mengenal pasti aspek penguatkuasaan dan pematuhan yang lebih tegas sebagai pemangkin dalam usaha menurunkan kadar rasuah di Malaysia.

Pada tahun 2017, 58.9% daripada kes rasuah telah berjaya diselesaikan dalam tempoh setahun selepas pendaftaran dalam tahun 2016. Mahkamah turut menyabit 80.7% daripada jumlah kes yang didaftar. Semua pencapaian ini dipacu oleh keberkesanan Mahkamah Khas untuk Rasuah dan SPRM dalam menjalankan penyiasatan. Selain itu, 1,405 daripada 1,695 jumlah kes yang dilaporkan dalam Laporan Ketua Audit Negara 2015 telah diselesaikan pada tahun 2017, iaitu pada kadar penyelesaian kes sebanyak 76.5%.

Satu lagi fokus di bawah NKRA ini adalah integriti agensi penguatkuasaan. Sebagaimana yang digariskan dalam Pelan Hala Tuju GTP pada 2010, keberkesanan agensi-agensi seperti Polis Diraja Malaysia (PDRM),

Jabatan Kastam Diraja Malaysia (JKDM), Jabatan Imigresen dan Jabatan Pengangkutan Jalan (JPJ) telah dipantau rapi susulan peningkatan kadar jenayah dan kekurangan tindakan ke atas kesalahan jenayah pada masa itu. Sehubungan dengan itu, Suruhanjaya Integriti Agensi Penguatkuasaan (Enforcement Agency Integrity Commission, EAIC) telah ditubuhkan pada tahun 2011 untuk mengukuhkan integriti pelbagai agensi penguatkuasaan di bawah bidang kuasanya dengan matlamat untuk membina keyakinan orang ramai terhadap pihak-pihak berkuasa. Sehingga 2017, 343 kes telah berjaya diselesaikan, iaitu 64% daripada jumlah kertas penyiasatan yang didaftar antara tahun 2012 hingga 2017. Tahun ini EAIC juga telah mengadakan dua sesi pendengaran awam berkenaan isu kematian bawah tahanan.

**“SPRM telah berjaya menyelesaikan 58.9% kes rasuah dalam tempoh setahun pendaftaran kes tersebut dan 80.7% daripada kes tersebut telah disabitkan.”**

Sementara itu, bagi memahami isu yang dihadapi oleh agensi-agensi dengan lebih mendalam dan menjalin kerjasama dengan agensi-agensi tersebut, EAIC



Seminar Hakim Mahkamah Rasuah khas diadakan pada bulan November 2017.



telah mengunjungi 32 buah agensi pada tahun 2017, termasuklah Agensi Antidadah Kebangsaan Pulau Pinang, Ibu Pejabat Kontinjen Polis Sabah dan JPJ Johor.

Selari dengan tanggungjawab pihak berkuasa anti-rasuah, rakyat turut memainkan peranan yang penting dalam memerangi rasuah. Akta Perlindungan Pemberi Maklumat 2010 (Akta 711) adalah penting untuk menggalakkan pelaporan mengenai kes dakwaan jenayah, rasuah serta penyalahgunaan kuasa. Perlindungan yang diberikan oleh Akta tersebut merangkumi kerahsiaan maklumat dan perlindungan daripada tuntutan mahkamah. Pemberi maklumat turut dilindungi daripada kemungkinan kemudaratan, iaitu istilah yang secara amnya merujuk kepada akibat yang timbul daripada tindakan mendedahkan maklumat. Akibat sedemikian termasuklah ancaman bahaya fizikal dan juga diskriminasi di tempat kerja.

Oleh itu, Akta tersebut melindungi “pemberi maklumat” yang mendedahkan maklumat tentang penyalah laku, sekali gus menggalakkan lebih ramai pemberi maklumat mengemukakan laporan. Justeru Akta ini membantu memupuk persekitaran toleransi sifar terhadap amalan rasuah dan apa-apa bentuk salah laku yang lain. Walau bagaimanapun, usaha-usaha masih perlu dipertingkatkan bagi menggalakkan orang ramai untuk memberi maklumat mengenai isu-isu integriti dan rasuah.

Untuk menggalakkan lagi penyertaan orang ramai dalam usaha menentang rasuah, sebuah sistem aduan atas talian yang dipanggil Sistem Pengurusan Aduan (Complaint Management System, CMS) telah disediakan untuk orang ramai membuat aduan atau menyalurkan maklumat berkenaan rasuah. Penjawat awam yang melaporkan tentang amalan rasuah juga akan diberikan ganjaran. Gerakan Revolusi Antirasuah, atau GERAH, suatu wadah kempen dan penglibatan antirasuah awam yang mendorong dan menggalakkan orang ramai supaya melaporkan rasuah, turut diwujudkan. Sejak kempen ke-4 GERAH, SPRM telah berjaya mendaftar 16,000 individu sebagai ahli GERAH. Usaha-usaha GERAH pula disokong oleh Sahabat GERAH, iaitu suatu kumpulan yang terdiri daripada orang ramai yang mendaftar sebagai rakan GERAH dan bersedia membantu SPRM dalam memerangi rasuah.

Akhir sekali, inisiatif Ikrar Bebas Rasuah (IBR), turut diperkenalkan. Inisiatif ini merupakan sebuah ikrar terbuka bertulis oleh individu daripada organisasi awam dan swasta untuk menyatakan sentimen antirasuah dan juga melaporkan kegiatan sedemikian.

## MENGUKUHKAN RANGKA KERJA PEMBANTERASAN RASUAH

### Berganding Bahu Membanteras Rasuah

Usaha membanteras gejala rasuah memerlukan komitmen daripada seluruh anggota masyarakat Malaysia. Oleh itu, Kerajaan telah berusaha dengan gigih untuk melibatkan komuniti perniagaan dan masyarakat sivil dalam usaha anti-rasuah. Syarikat swasta dan syarikat berkaitan Kerajaan digalakkan untuk menandatangani Ikrar Integriti Korporat. Kerjasama sektor awam dan swasta untuk menggalakkan integriti dan tadbir urus yang baik dalam entiti swasta dilakukan berdasarkan rangka kerja Sistem Integriti Korporat Malaysia (CISM) yang dijadikan model untuk menyokong inisiatif integriti korporat di Malaysia. Ini termasuk menambah baik tadbir urus, etika perniagaan dan tanggungjawab sosial korporat. Usaha-usaha ini memerlukan komitmen jangka panjang dan rasa tanggungjawab yang mendalam oleh semua pihak berkepentingan untuk mencapai sepenuhnya objektif CISM. Sehingga kini, terdapat seramai 1,119 pihak yang telah menandatangani CISM.

**“Sehingga 31 Disember 2017, 223,167 Perjanjian Integriti sudah ditandatangani, yang melibatkan projek-projek yang bernilai sebanyak RM13 bilion.”**

Syarikat-syarikat yang terlibat dalam Perolehan Kerajaan juga telah diwajibkan untuk menandatangani Perjanjian Integriti. Perjanjian Integriti merupakan inisiatif NKRA Membanteras Rasuah yang telah bermula pada tahun 2010. Inisiatif ini bertujuan untuk meningkatkan ketelusan dan membanteras amalan rasuah dalam proses-proses perolehan Kerajaan. Sehingga 31 Disember 2017, 223,167 Perjanjian Integriti sudah ditandatangani, yang melibatkan projek-projek yang bernilai sebanyak RM13 bilion.



## Memperkasakan Integriti Korporat

Cadangan memperkenalkan Peruntukan Liabiliti Korporat ke dalam pindaan Akta SPRM 2009 telah dikenal pasti dalam usaha untuk menghalang syarikat korporat daripada menggalakkan pekerjaannya terlibat dalam amalan rasuah, sama ada secara langsung atau tidak langsung. Peruntukan tersebut akan mengenakan liabiliti jenayah terhadap syarikat atas kesalahan rasuah yang dilakukan oleh para pekerja, melainkan syarikat yang didakwa itu boleh membuktikan bahawa prosedur untuk mengelakkan penglibatan pekerjaannya dalam aktiviti rasuah telah disediakan dengan selengkapnya. Peruntukan ini akan turut memperkasakan Akta SPRM yang pada masa ini tidak mempertanggungjawabkan ahli lembaga pengarah, ketua pegawai eksekutif dan badan korporat secara langsung atas tindakan para pekerja mereka. Dalam beberapa kes, pekerja yang terbabit telah ditangkap dan dihukum walaupun salah laku tersebut dilakukan atas arahan dari syarikat. Peruntukan Liabiliti Korporat bertujuan untuk mengatasi kes-kes seperti ini dan telah disyorkan oleh Pertubuhan Kerjasama dan Pembangunan Ekonomi (Organisation for Economic Co-operation and Development, OECD) sebagai salah satu undang-undang terbaik untuk membendung korupsi. Peruntukan ini dijangka akan dibentangkan di Parlimen pada tahun 2018.

Pengenalan Peruntukan Liabiliti Korporat akan diperkenalkan menjelang tahun 2018 dan disokong oleh penerapan piawaian ISO 37001 dalam Sistem Pengurusan Antirasuah Malaysia (ABMS - MS-ISO 37001) yang akan memperluaskan kawalan antirasuah yang sedia ada. Peruntukan ini telah dilancarkan pada 27 Oktober 2017 dan akan meletakkan Malaysia sejajar dengan Konvensyen Anti-Rasuah Pertubuhan Bangsa-bangsa Bersatu (United Nations Convention Against Corruption, UNCAC). Piawaian tersebut menetapkan beberapa langkah yang khusus bagi membantu organisasi-organisasi untuk mencegah, mengesan dan menangani rasuah. Antara langkah yang ditetapkan termasuklah pengamalan dasar anti-rasuah dan pelantikan seorang penyelia untuk memantau pematuhan amalan antirasuah, latihan dan penilaian risiko.

Pada masa kini, pematuhan MS ISO 37001:2016 dilaksanakan secara sukarela sehinggalah piawaian ini diwartakan atau menjadi rujukan dalam Akta-akta atau peraturan-peraturan yang berkaitan. Sehingga kini, 11 organisasi termasuk badan-badan korporat, agensi-agensi awam dan pihak berkuasa tempatan telah diberi pensijilan MS ISO 37001:2016 oleh SIRIM QAS Internasional Sdn Bhd.

## Meningkatkan Pengawasan Integriti Sistem Politik

Di bawah NTP, usaha memerangi rasuah turut tertumpu kepada usaha pembaharuan amalan tadbir urus pembiayaan politik, berikutan tuntutan rakyat agar maklumat mengenai sumber dana politik selama ini dijadikan lebih telus. Bagi memenuhi kehendak ini, YAB Perdana Menteri telah menubuhkan Jawatankuasa Perundingan Nasional Mengenai Pembiayaan Politik (National Consultative Committee on Political Funding, NCCPF) pada 14 Ogos 2015 untuk membina struktur pengawalseliaan yang dapat menangani pembiayaan politik dengan menyeluruh.

**“Kelulusan Rang Undang-Undang Pembiayaan Politik akan menandakan suatu transformasi yang revolusi dalam usaha meningkatkan integriti sistem politik Malaysia.”**

Pada tahun 2017 pula, sebuah Jawatankuasa Khas telah ditubuhkan untuk menyediakan draf Rang Undang-Undang Pembiayaan Politik. Draf ini mengambil kira maklum balas yang diterima oleh semua pihak yang terlibat dalam sesi temuan JKNMPP yang telah dijalankan sejak tahun 2016. Pembentangan dan kelulusan Rang Undang-Undang ini di Parlimen kelak akan menandakan suatu transformasi yang revolusi dalam usaha meningkatkan integriti sistem politik Malaysia. 32 cadangan akan dipertimbangkan dalam Rang Undang-undang baharu tersebut termasuklah derma politik dan pentadbirannya, perbelanjaan, pendedahan dan pembiayaan awam. Penyediaan pertama Rang Undang-undang ini sedang dilaksanakan oleh Institut Integriti Malaysia (IIM).



**Bengkel Indeks Persepsi Rasuah dijalankan untuk menambah baik skor CPI Malaysia.**



19 orang hakim dari 14 buah negeri telah menghadiri Seminar Hakim Mahkamah Rasuah Khas.

## TADBIR URUS YANG BAIK SEBAGAI SUATU KEBANGGAAN

Keberkesanan usaha negara dalam menentang rasuah memerlukan pematuhan terhadap kawalan antirasuah dan peningkatan dalam standard integriti. Hal ini seterusnya memerlukan peningkatan kesedaran dan latihan bagi pegawai-pegawai yang berkaitan, terutamanya mereka yang terlibat dalam proses yang terdedah kepada risiko tinggi rasuah dan sogokan. Oleh yang demikian, Kerajaan telah bekerjasama dengan badan-badan seperti Institut Tadbir Urus Korporat Malaysia (Malaysian Institute of Corporate Governance, MICG) dan Perikatan Integriti Perniagaan (Business Integrity Alliance, BIA) bagi menyediakan panduan kepada organisasi-organisasi untuk menambah baik amalan tadbir urus dan pencegahan rasuah. Pada tahun 2017, MICG dan BIA telah berjaya melatih 53 syarikat tersenarai awam (PLC) dan syarikat berkaitan kerajaan (GLC).

Berkenaan latihan untuk mahkamah pula, Seminar Hakim Mahkamah Rasuah Khas telah diadakan setiap tahun sejak 2011 dengan tujuan meningkatkan pemahaman menyeluruh tentang peruntukan undang-undang menurut Akta SPRM 2009. Latihan untuk hakim mengenai rasuah merangkumi pelbagai topik termasuklah penulisan pertimbangan undang-undang dan kerumitan dalam menangani pelbagai jenis cabaran dalam pengendalian kes rasuah. Dari 2011 ke 2018, sebanyak lapan kursus telah dijalankan untuk melatih Hakim Mahkamah Rasuah Khas dan telah melibatkan 152 hakim dari seluruh negara. Kursus ini secara amnya tertumpu pada penggunaan undang-undang negara terhadap isu menghadapi rasuah. Pada tahun 2017, 19 hakim dari 14 negeri telah menghadiri kursus sepanjang tiga hari yang diadakan di Shah Alam, Selangor.

## Perjuangan JITN membanteras rasuah



**Zaeidah Mohamed Esa,  
Ketua Pengarah,  
Jabatan Integriti dan  
Tadbir Urus Negara.**

Jabatan Integriti dan Tadbir Urus Negara (JITN) memainkan peranan yang amat besar dalam usaha membanteras rasuah. JITN asalnya sebuah unit yang dikenali sebagai Bahagian Integriti dan Tadbir Urus (BITU) di Jabatan Perdana Menteri sebelum unit tersebut dinaik taraf menjadi sebuah jabatan sendiri pada November 2017. Kini, JITN berperanan sebagai Pejabat Pengurusan Penyampaian (Delivery Management Office, DMO) yang memantau pelaksanaan inisiatif NKRA Membanteras Rasuah selain bertindak sebagai agensi pusat untuk pengurusan integriti, tadbir urus, dan hak asasi manusia dalam sektor awam dan swasta.

Sebagai Ketua Pengarah JITN, tanggungjawab Zaeidah Mohamed Esa termasuklah memantau dan mengawasi keseluruhan pelaksanaan fungsi teras JITN berdasarkan prinsip-prinsip pencegahan rasuah menerusi transformasi penetapan minda dan sikap rakyat Malaysia. Tugas beliau melibatkan penetapan amalan tadbir urus baik, prosedur, serta peraturan yang menyumbang kepada pengurangan kadar rasuah dalam negara ini.

“JITN komited dalam menjalankan tanggungjawabnya untuk memantau semua inisiatif NKRA dan memastikan semua inisiatif ini berjaya dilaksanakan. Ini termasuk menjalankan Bengkel Indeks Persepsi Rasuah (Corruption Perception Index, CPI) untuk menambah baik skor CPI Malaysia daripada 49 pada tahun 2016 kepada 55 menjelang tahun 2020; selain mempromosi Sistem Pengurusan Antirasuah (Anti-Bribery Management System, ABMS) untuk menggalakkan syarikat-syarikat mendapatkan pensijilan MS ISO 37001, antara lain,” jelas Zaeidah.

Beliau juga menegaskan bahawa walaupun JITN merupakan barisan hadapan dalam usaha memerangi rasuah, namun usaha ini merupakan usaha sama semua unit dalam Kerajaan. Dalam perkhidmatan awam, ketua-ketua unit integriti di semua kementerian, jabatan, dan

agensi bertanggungjawab turut membantu memacu perubahan bagi memperkukuhkan integriti dan tadbir urus dalam. “Mereka berperanan sebagai ejen transformasi dalam jabatan masing-masing, dan perlu melapor kepada saya, sebagai Ketua Pengarah JITN. Rantainya perintah yang baharu ini akan membantu memupuk budaya kebertanggungjawaban organisasi yang kukuh dengan intoleransi sifar terhadap penyalahgunaan kuasa dan rasuah.”

Selanjutnya, kursus untuk para hakim yang berkhidmat di Mahkamah Khas untuk Rasuah telah dijalankan dengan kerjasama Pejabat Ketua Pendaftar Mahkamah Persekutuan Malaysia. JITN juga bekerjasama dengan Suruhanjaya Pencegahan Rasuah Malaysia untuk menyenggara portal web Sistem Integriti Korporat Malaysia (Corporate Integrity System Malaysia, CISM).

“Rasuah turut berlaku dalam sektor swasta. Melalui kerjasama strategik dengan Business Integrity Alliance Berhad dan Institut Tadbir Urus Korporat Malaysia, agenda untuk memperkasa integriti dan tadbir urus swasta dalam sektor swasta boleh dilaksanakan dengan lebih berkesan. JITN juga membiayai wakil Malaysia ke Persidangan Menentang Rasuah Pertubuhan Bangsa-Bangsa Bersatu, dan Akademi Antirasuah Antarabangsa; kedua-duanya membuka saluran bagi kerjasama multilateral dalam pelbagai inisiatif pencegahan rasuah,” Zaeidah menjelaskan.

Beliau mengakui bahawa rasuah bukan sahaja berlaku di Malaysia, atau hanya dalam sektor awam atau swasta. “Rasuah wujud di mana-mana, sama ada dalam institusi antarabangsa, institusi agama, badan sukarela, atau pertubuhan sukan. Saya secara peribadi berpendapat bahawa usaha untuk membanteras rasuah sepenuhnya pada semua peringkat merupakan cabaran terbesar JITN. Usaha memerangi rasuah haruslah bermula dengan penyelesaian yang proaktif. Oleh itu, adalah tanggungjawab JITN untuk memastikan integriti dan tadbir urus baik berjaya diterapkan dan diperhalusi, terutamanya dalam semua sistem dan dasar Kerajaan.”

Kesemua usaha dan inisiatif yang dirancang ini diharapkan dapat menyumbang kepada penurunan kadar rasuah di Malaysia, dan pada masa yang sama, menjajarkan penetapan minda rakyat dengan matlamat NTP untuk menjadikan Malaysia sebuah negara maju berpendapatan tinggi. “Matlamat NTP bukan sahaja untuk mencapai kadar pertumbuhan yang lebih tinggi tetapi juga pertumbuhan yang mampan dan inklusif. Ekonomi kita kini lebih kukuh dan mampan dan pada pendapat saya, kita semakin menghampiri sasaran untuk mencapai status negara maju menjelang tahun 2020.



## TINJAUAN MASA HADAPAN ▶▶

Pada masa hadapan, usaha-usaha baru akan diperkenalkan untuk meningkatkan kedudukan Malaysia dalam penarafan CPI dan memastikan peningkatan yang lebih kukuh dalam ketelusan dan integriti pelaksanaan perkhidmatan awam negara. Jabatan Integriti dan Tadbir Urus Negara (JITN) yang baru ditubuhkan akan menjadi agensi utama untuk memantau dan menyelaras aktiviti yang berkaitan dengan NKRA Membanteras Rasuah.

Untuk memastikan kedudukan CPI Malaysia bertambah baik pada tahun-tahun akan datang, sebuah bengkel telah diadakan dari 5 hingga 7 September 2017 untuk menangani kemerosotan kedudukan CPI negara. Hasil penting yang dijana daripada bengkel ini merangkumi tujuh inisiatif utama yang telah dikenal pasti untuk menangani 13 isu utama yang dikemukakan berkaitan dengan pencegahan, penguatkuasaan dan persepsi. Inisiatif-inisiatif ini akan dilaksanakan pada tahun 2018 oleh pihak yang berkaitan.

Sejajar dengan pengenalan Peruntukan Liabiliti Korporat di bawah Akta SPRM dan sebagai langkah berjaga-jaga untuk mengurangkan rasuah dan menggalakkan tadbir urus yang baik, Kerajaan juga akan menggalakkan syarikat supaya memperoleh pensijilan MS-ISO 37001. Memandangkan piawaian tersebut boleh digunakan sebagai garis panduan pematuhan antirasuah dalam Akta SPRM 2009, lebih banyak syarikat dijangka akan memperoleh sijil tersebut bagi menunjukkan pematuhan terhadap peruntukan baharu ini.

---